

## I. DISPOSICIÓN XERAIS

### MINISTERIO DE ECONOMÍA E FACENDA

**19950** Orde EHA/3319/2009, do 10 de decembro, pola que se modifica a Orde EHA/3364/2008, do 21 de novembro, pola que se desenvolve o artigo 1 do Real decreto lei 7/2008, do 13 de outubro, de medidas urxentes en materia económico-financeira en relación co Plan de Acción Concertada dos países da zona euro.

Esta orde ten por obxecto flexibilizar as condicións para a ampliación do prazo de emisión de obrigas de pagamento, bonos e obrigacións susceptibles de ser avalados pola Administración xeral do Estado no marco da Orde EHA/3364/2008, do 21 de novembro, pola que se desenvolve o artigo 1 do Real decreto lei 7/2008, do 13 de outubro, de medidas urxentes en materia económico-financeira, en relación co Plan de Acción Concertada dos países da zona euro, co fin de facilitar unha distribución temporal das emisións máis eficiente.

En efecto, a Orde EHA/3364/2008, do 21 de novembro, veu concretar determinados aspectos fundamentais do réxime de outorgamento de avais do Estado autorizado polo citado real decreto lei ás operacións de financiamento novas que realicen as entidades de crédito residentes en España. Esta orde modificouse pola Orde EHA/3748/2008, do 23 de decembro, co fin de garantir a plena efectividade e máxima utilidade dos avais, dándolle unha nova redacción entre outros aspectos ao requisito do prazo para emitir. Esta modificación levouse a cabo tendo en conta a evolución do mercado e a súa capacidade limitada para absorber grandes volumes de emisións.

De conformidade coa redacción dada pola Orde EHA/3748/2008 ao artigo 7.3 da Orde EHA/3364/2008, do 21 de novembro, as emisións con cargo ao orzamento xeral do Estado para 2008 deberían realizarse antes do 15 de decembro de 2009 e establecerse por resolución da Dirección Xeral do Tesouro e Política Financeira o prazo límite para as emisións con cargo ao orzamento xeral do Estado para 2009.

No entanto, tal e como establecía a parte expositiva da norma, todo iso entendíase sen prexuízo de que o mecanismo puidese ser revisado atendendo ás condicións de mercado, sendo obrigada en todo caso a revisión do réxime con carácter semestral, co fin de comprobar a subsistencia dos motivos que determinaron a súa adopción.

En consecuencia, o 25 de xuño de 2009, a Comisión Europea autorizou a prórroga do réxime de avais español logo da súa revisión semestral debido a que, aínda que os avais outorgados contribuíran positivamente a reducir o impacto da crise no financiamento das entidades de crédito, persistía, en certa medida, a incerteza e inestabilidade dos mercados financeiros internacionais que determinaron as dificultades de acceso ao financiamento por parte do sector financeiro.

Estas circunstancias, que determinaron o outorgamento o 30 de setembro de 2009 de novos avais con cargo á reserva de 64.000 millóns de euros fixada no artigo 54.dous.d) da Lei 2/2008, do 23 de decembro, de orzamentos xerais do Estado para o ano 2009, aconsellan tamén a extensión do período de tempo en que se poidan realizar as emisións avaladas máis alá do 15 de decembro de 2009. Por esa razón, e coincidindo coa nova revisión semestral do réxime de avais, solicitóuselle á Comisión Europea a ampliación do prazo para realizar emisións avaladas.

Por este motivo, esta orde modifica o artigo 7.3 da Orde EHA/3364/2008, do 21 de novembro, e habilita a directora xeral do Tesouro e Política Financeira para prolongar mediante resolución o prazo de emisión de instrumentos avalados, en caso de que a Comisión Europea autorice esta ou outras prórrogas. Todo iso sen esquecer o carácter temporal destas medidas que só permanecerán mentres que a situación de crise xustifique a súa aplicación.

Esta orde dítase en virtude das habilitacións previstas no artigo 1.4 e na disposición derradeira primeira do Real decreto lei 7/2008, do 13 de outubro, de medidas urxentes en materia económico-financeira en relación co Plan de Acción Concertada dos países da zona euro.

Na súa virtude, e de acordo co Consello de Estado, dispoño:

Artigo único. *Modificación da Orde EHA/3364/2008, do 21 de novembro, pola que se desenvolve o artigo 1 do Real decreto lei 7/2008, do 13 de outubro, de medidas urxentes en materia económico-financeira en relación co Plan de Acción Concertada dos países da zona euro.*

O número 3 do artigo 7, outorgamento de avais, da Orde EHA/3364/2008, do 21 de novembro, pola que se desenvolve o artigo 1 do Real decreto lei 7/2008, do 13 de outubro, de medidas urxentes en materia económico-financeira en relación co Plan de Acción Concertada dos países da zona euro, queda redactado nos seguintes termos:

«3. As emisións avaladas deberanse realizar antes do 15 de decembro de 2009, salvo que a Comisión Europea autorice a extensión do programa de avais ata unha data posterior, caso en que, mediante resolución da Dirección Xeral do Tesouro e Política Financeira, se establecerá a correspondente prolongación do prazo para realizar emisións garantidas.»

Disposición derogatoria única. *Derrogación normativa.*

Quedan derogadas cantas disposicións de igual ou inferior rango se opoñan ao disposto nesta orde ministerial.

Disposición derradeira única. *Entrada en vigor.*

Esta orde entrará en vigor o mesmo día da súa publicación no «Boletín Oficial del Estado».

Madrid, 10 de decembro de 2009.—A vicepresidenta segunda do Goberno e ministra de Economía e Facenda, Elena Salgado Méndez.